

稼軒長短句

卷十一之十二
補遺校記跋

稼軒長短句

四冊

版權所有

中華民國十七年四月初版

每部定價大洋壹圓

外埠酌加運費匯費

校

者

林

大

椿

發行

者

兼

商

務

印

書

館

發

行

所

商

務

印

書

館

上海

及

各

埠

上海

寶

山

路

稼軒長短句卷十一

宋 歷城 辛棄疾 幼安

菩薩蠻

金陵賞心亭爲葉丞相賦

青山欲共高人語。聯翩萬馬來無數。煙雨却低回。
望來終不來。人言頭上髮。總向愁中白。拍手笑
沙鷗。一身都是愁。

二

用前韻

錦書誰寄相思語。天邊數徧飛鴻數。一夜夢千回。
梅花入夢來。漲痕紛樹髮。霜落瀟湘白。心事莫
驚鷗。人間千萬愁。

三

江搖病眼昏如霧。送愁直到津頭路。歸念樂天詩。人生足別離。雲屏深夜語。夢到君知否。玉筯莫偷垂。斷腸天不知。

四

書江西造口壁

鬱孤臺下清江水。中間多少行人淚。西北望長安。可憐無數山。青山遮不住。畢竟東流去。江晚正愁余。山深聞鷓鴣。

五

西風都是行人恨。馬頭漸喜歸期近。試上小紅樓。飛鴻字字愁。闌干閒倚處。一帶山無數。不似遠

山橫。秋波相共明。

六

功名飽聽兒童說。看公兩眼明如月。萬里勒燕然。老人書一編。玉階方寸地。好趁風雲會。他日赤松游。依然萬戶侯。

七

送祐之弟歸浮梁

無情最是江頭柳。長條折盡還依舊。木葉下平湖。雁來書有無。雁無書尙可。好語憑誰和。風雨斷腸時。小山生桂枝。

八

送鄭守厚卿赴闕

送君直上金鑾殿。情知不久須相見。一日甚三秋。
愁來不自由。九重天一笑。定是留中了。白髮少
經過。此時愁奈何。

九

送曹君之莊所

人間歲月堂堂去。勸君快上青雲路。聖處一燈傳。
工夫螢雪邊。麴生風味惡。辜負西窗約。沙岸片
帆開。寄書無雁來。

十

席上分賦得櫻桃

香浮乳酪玻璃盃。年年醉裏嘗新慣。何物比春風。
歌唇一點紅。江湖清夢斷。翠籠明光殿。萬顆瀉

輕勻。低頭愧野人。

十一

賦摘阮

阮琴斜挂香羅綬。玉纖初試琵琶手。桐葉雨聲乾。
珍珠落玉盤。朱絃調未慣。笑倩東風伴。莫作別
離聲。且聽雙鳳鳴。

十二

雪樓賞牡丹席上用楊民瞻韻

紅牙籤上羣仙格。翠羅蓋底傾城色。和雨淚闌干。
沉香亭北看。東風休放去。怕有流鶯訴。試問賞
花人。曉粧勻未勻。

十三

和盧國華提刑

旌旗依舊長亭路。尊前試點鶯花數。何處捧心顰。
人間別樣春。功名君自許。少日聞雞舞。詩句到
梅花。春風十萬家。時籍中有放自便者

十四

贈張醫道服爲別且令餽河豚

萬金不換囊中術。上醫元自能醫國。軟語到更闌。
綈袍范叔寒。江頭楊柳路。馬踏春風去。快趁兩
三杯。河豚欲上來。

十五

趙晉臣席上時張菩提葉燈趙茂嘉扶病

攜歌者

看燈元是菩提葉。依然會話菩提法。法似一燈明。
須臾千萬燈。燈邊花更滿。誰把香花散。說與病
維摩。而今天女歌。

十六

題雲巖

游人占却巖中屋。白雲只在檐頭宿。嘯鳥苦相催。
夜深歸去來。松篁通一徑。嚙嚙山花冷。今古幾
千年。西鄉小有天。

十七

重到雲巖戲徐斯遠

君家玉雪花如屋。未應山下成三宿。啼鳥幾曾催。
西風猶未來。山房連石徑。雲臥衣裳冷。倩得李

延年清歌送上天。

十八

晝眠秋水

葛巾自向滄浪濯。朝來漉酒那堪着。高樹莫鳴蟬。
晚涼秋水眠。竹床能幾尺。上有華胥國。山上咽
飛泉。夢中琴斷弦。

卜算子

尋春作

脩竹翠蘿寒。遲日江山暮。幽逕無人獨自芳。此恨
知無數。只共梅花語。嬾逐遊絲去。著意尋春不
肯香。香在無尋處。

爲人賦荷花

紅粉靚梳粧。翠蓋低風雨。占斷人間六月涼。明月
鴛鴦浦。根底藕絲長。花裏蓮心苦。只爲風流有
許愁。更襯佳人步。

三

聞李正之茶馬訃音

欲行且起行。欲坐重來坐。坐坐行行有倦時。更枕
閒書臥。病是近來身。嬾是從前我。淨掃瓢泉竹
樹陰。且恁隨緣過。

四

飲酒敗德

盜跖儻名丘。孔子如名跖。跖聖丘愚直到今。美惡

無眞實。簡策寫虛名。螻蟻侵枯骨。千古光陰一霎時。且進盃中物。

五

用莊語

一以我爲牛。一以我爲馬。人與之名受不辭。善學莊周者。江海任虛舟。風雨從飄瓦。醉者乘車墜不傷。全得於天也。

六

漫興

夜雨醉瓜廬。春水行秧馬。點檢田間快活人。未有如翁者。掃禿兔毫錐。磨透銅臺瓦。誰伴楊雄作解嘲。烏有先生也。

七

珠玉作泥沙。山谷量牛馬。試上纍纍丘壠看。誰是
彊梁者。水浸淺深簷。山壓高低瓦。山水朝來笑
問人。翁早歸來也。

八

千古李將軍。奪得胡兒馬。李蔡爲人在下中。却是
封侯者。芸艸去陳根。篲竹添新瓦。萬一朝廷舉
力田。舍我其誰也。

九

用韻答趙晉臣數文。趙有真得歸方是閑
堂

百郡怯登車。千里輸流馬。乞得膠膠擾擾身。却笑

區區者。野水玉鳴渠。急雨珠跳瓦。一榻清風方是閒。真是歸來也。

十

萬里籬浮雲。一噴空凡馬。歎息曹瞞老驥詩。伏櫪如公者。山鳥哢窺簷。野鼠飢翻瓦。老我癡頑合住山。此地菟裘也。

十一

齒落

剛者不堅牢。柔的難摧挫。不信張開口角看。舌在牙先墮。已闕兩邊廂。又豁中間箇。說與兒曹莫笑翁。狗竇從君過。

十二

飲酒成病

一箇去學仙。一箇去學佛。仙飲千盃醉似泥。皮骨如金石。不飲便康彊。佛壽須千百。八十餘年入涅槃。且進盃中物。

十三

飲酒不寫書

一飲動連宵。一醉長三日。廢盡寒溫不寫書。富貴何由得。請看塚中人。塚似當時筆。萬札千言只恁休。且進盃中物。

醜奴兒

醉中有歌此詩以勸酒者聊隳括之

晚來雲淡秋光薄。落日晴天。落日晴天。堂上風斜

畫燭煙。從渠去買人間恨。字字都圓。字字都圓。
腸斷西風十四絃。

二

尋常中酒扶頭後。歌舞支持。歌舞支持。誰把新詞。
喚住伊。臨歧也有傍人笑。笑已爭知。笑已爭知。
明月樓空燕子飛。

三

書博山道中壁

煙蕪露芰荒池柳。洗雨烘晴。洗雨烘晴。一樣春風。
幾樣青。提壺脫袴催歸去。萬恨千情。萬恨千情。
各自無聊各自鳴。

四

此生自斷天休問。獨倚危樓。獨倚危樓。不信人間
別有愁。君來正是眠時節。君且歸休。君且歸休。
說與西風一任秋。

五

少年不識愁滋味。愛上層樓。愛上層樓。爲賦新詞
彊說愁。而今識盡愁滋味。欲說還休。欲說還休。
却道天涼好箇秋。

六

近來愁似天來大。誰解相憐。誰解相憐。又把愁來
做箇天。都將今古無窮事。放在愁邊。放在愁邊。
却自移家向酒泉。

七